

# Domat solidari envers requirents d'asil

Suttetg en implant da schurmetg civil

■ **(anr/fa) Per sis mais vegnan ad abitar 80 requirents d'asil da 16 naziuns a Domat en ils tschalers da la protecziun civila Caguils. Ina grupp accumpagnanta vegn ad observar la situaziun e reagir sch'i fa basegn.**

Causa las numerusas dumondas d'asil en Svizra ha augmentà la confederaziun il dumber da requirents d'asil, dals quals il chantun Grischun duai s'occupar: «Fin la fin da l'onn faschain nus quint cun circa 800 ulteriuras dumondas d'asil qua en chantun», ha ditg *Marcel Suter*, il manader da l'Uffizi chantunal per migraziun e dretg civil. Per dar suttetg a tut questas personas èn el e ses collavurats londervi a tschertgar en Grischun pussaivladads per stgaffir ulteriurs centers per requirents d'asil. Quai dovra però ses temp. Els hajan survegnì pliras propostas ch'ins examineschia uss ensemen cun l'Uffizi da construcziun auta chantunal, ha'l declerà, «durant l'onn 2016 èsi previs d'avrir en Grischun dus fin trais novs centers.» Quai dura dentant memia ditg, l'uffizi sto chattar gia uss lieus

per dar per in emprim temp suttetg als requirents che arrivon proximamain en il chantun.

## **Cuira e Domat ils emprims lieus**

«Ulteriurs letgs per requirents d'asil existan en las vischnancas grischunas en ils implants da la protecziun civila. In da quels implants avain nus gia pudì prender e funcziun a Cuira tar l'ufficina da l'Argo Plankis», ha menziunà Suter. Quel vegn la fin d'october dentant ad esser occupà plainamain. Perquai èn el e ses collavurats en discurs cun pliras vischnancas per pudair duvrar er lur implants dal schurmetg civil. «La vischnanca da Domat ha respus ch'ella mettia a disposiziun ses tschaler Caguils, qua èsi lieu per 80 personas.» I vegnain ad esser personas da 16 naziuns, la gronda part da l'Eritrea, agiunscha il manader da l'uffizi per migraziun. Ellas vegnan ad abitar qua in mez onn. «Nagin nun ha dad abitar sis mais en fila en quest tschaler», ha accentuà Suter, «suentar otg fin diesch emnas midain nus, alura vegnan requi-

rents cha abitan en edifizis sur terra a star in temp en il tschaler Caguils.» Mesemna saira han envidà quest uffizi e la vischnanca da Domat la populaзиun ad ina sairada d'infurmaziun. Var 150 personas èn vegnidas.

## **«Malgrà la stretga vischinanza a la scola»**

Tant Marcel Suter sco era *Beatrice Basaglia*, la presidenta communal da Domat, han constatà ina grond'acceptanza dals preschents per quest intent: «La gronda part d'els ha manegià ch'i saja da dar suttetg a quests fugitivs», han ditg omadus. Dumondas criticas hai dà surtut causa la scola primara ch'è en stretga vischinanza dal tschaler da protecziun Caguils. «Ina mamma che ha trais uffants che van là a scola ha manegià ch'ins na duessia betg pensar ch'ils requirents d'asil che vegnian ad abitar qua en quel tschaler sajan tuts personas cun nauschas intenziuns, che quai saja segiramain glied sco nus», ha ditg Basaglia, «per quel votum ha ella survegnì grond applaus.» Suter ha declerà ch'ins

saja londervi a tschertgar ils commembers per ina grupp accumpagnanta. Quella vegn a consistar da scolasts, geniturs, vischins e represchents da la vischnanca. «Cun agid da quella grupp vegnan ins a vesair spert sch'i dat problems e sch'igl'èn da decider mesiras», ha ditg la presidenta communal. Actualmain èn l'uffizi respunsabel e la vischnanca londervi a preparar il contract en chausa.

«Domat n'ha da pajair nagut per la glied che vegn ad abitar qua, la vischnanca survegn per il tschaler Caguils 300 fin 350 francs tschains al di per tut il menaschi», ha orientà Beatrice Basaglia.